

'NTO PARADISU

Nu jionnu nostru Signuri Gesù Cristu,

pinsavu 'i visitari u' Paradisu.

Chiamavu lestu lestu Simon Petru

pi' farisi accumpagnari pi' stu casu.

Lungu i viali, frischi e virdiggianti,

passiavunu u' Maestru e Santu Petru.

L' animi di Biati e di Santi

cu' gioia tutti Cristu ludavunu

chinandusi finu a' nterra rivirenti.

Ogni tantu, però, Gesù gluriusu

sturcia u' mussu e 'nta facci si scurava

e a' testa chianu chianu tintinnava.

Petru, omu spertu, ma curiusu,

stetti 'n pocu pinsirusu, riflittennu.

Ma poi, presu d' istintu 'mpituusu,

nisciu o' soi, cu' ffari assai scuntrusu.

Maestru, chi aviti da ridiri ?

Vi vidu oltremodu frastornatu.

Petru, Petru, rispusi nostru Signuri,
chi mi cummini facennu a' sta' manera :

girannu pi' stu' Santu Paradisu
notu facci brutti a' ogni cantunera.

Fimmini i' mali affari,
avari, usurai e latriceddi,
'mbrugghiuni, manu lesti e grossi bari.

Ah no !, Patri Maistru,
a mia sti cosi no' mi potiti diri,
replica Petru tuttu arrabbiatu.

A' culpa non è a' mia. Voliti sapiri ?

Fu' i' Vostra Matri. Sì, propriu Idda.

'Nto so' cori su' tutti figghji, anche se tristi
e a sciumi 'nta stu locu 'i fà entrari.

Gesù si queta, s' illumina 'nto visu,
gioisci pu' gran cori di so' Matri.

L'anciuli cuminciunu a cantari
na luci abbagghia tuttu u' Paradisu
picchì Cristu no ostacula Maria,
anzi accunsenti e a' binidici.

Così fici a Cana rispittusu
e mai a' voli scuntintari.

Pi' Idda, pi' l' Amuri chi ci porta,
è prontu i piccaturi 'a pirdunari.

8 Agosto 2007

GIANNI MANGANO